



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

*Komunikadu Imprensa*

**Periodu : Janeiro 2011**

**Edisaun : 20 Janeiro 2011**

**Arguidu ba kazu violasaun seksual ameadu ho pena prizaun to'o tinan 15**

Iha loron 13 Janeiro 2011, Tribunál Distritál Dili halo julgamentu bá kazu violasaun seksual ho número prosesu 244/C.ord/2011/TDD. Kazu ne'e diskonfia komete husi arguidu ADS hasoru lezada CDP iha Maumeta, Liqiuca iha loron 20 Juñu 2009.

Julgamentu ba kazu ida ne'e deriji husi juiz koleтиву mak hanesan: Dr. João Ribeiro, Dr. João Felgar no mos Dr. Antonio Fonseca. Husi parte Ministériu Públiku, representa husi Dr. Hipolito Exposto no husi parte defeza, representa husi Dra. Marcia Sarmento husi eskritoriu Defensoria Públika.

Diretór JSMP Luis de Oliveira Sampaio haktuir katak: *"violasaun seksual hanesan kazu ne'ebé mak sempre akontese iha sociedade nia leet. Tanba ne'e relasionadu ho kazu ne'ebé julga dau-daun, nia husu bá tribunál atu bele fo sansaun tuir lei ne'ebé mak vigor. Alende ne'e, husu mos bá ministériu públiku hodi halo esforsu hot-hotu ne'ebé posivel atu asegura faktus relevantes hodi produz evidénsia ne'ebé adekuadu no forte ba kazu refere.*

Bazea ba deklarasaun ne'ebé maka lezada hato'o iha tribunal, katak kazu ne'e akontese, iha data 20 de Juñu 2009, wainhira arguidu (kolega ho lezada nia maun) bá tobá iha lezada nia uma. Maiz ou menus iha tuku 10.00 ka 11.00 kalan. Wainhira, lezada toba dukur hela, arguidu tama bá ninia kuartu no halo violasaun seksual hasoru nia. Lezada mos deklarata katak, iha momentu kazu ne'e akontese lezada buka meus ka halo esforsu atu hakilar, maibé la bele tanbá arguidu tata nia ibun no hanehan maka'as nia.

Iha parte seluk, wainhira juiz koleтиву lê akuzasaun ba argidu, arguidu rezeita totalmente akuzasaun ne'e no hateten katak akuzasaun hirak ne'e la los. Alende rona deklarasaun husi arguidu no lezada, tribunal mos rona depoimentu husi sasin nain rua.

Ministériu Públiku iha kazu ida ne'e, akuza arguidu ho Artigu 172 Kódigu Penál Timór Léste nian konaba violencia seksual.

Nune'e mos iha alegasaun final, ministériu públiku nafatin mantein nia alegasaun ho artigu 172 Kódigu Penál ne'ebé maka akuza bá arguidu. Tanba, depois rona tiha deklarasaun no depoimentus husi arguidu, lezada, no testemuña sira, iha duni indisiu sufisiente katak arguidu halo violasaun seksual hasoru lezada.

Depois rona tiha alegasaun final husi ministériu públiku, tribunal fo oportunidade ba parte defeza atu hatan alegasaun ne'e. Kuandu hetan tiha oportunidade ne'e, husi parte defeza kontra akuzasaun ne'e, tanba tuir defeza katak, ministériu públiku la hatudu evidensia ne'ebé mak forte. Nune'e husu ba tribunal atu absolve arguidu.

Audensia julgamentu hodi rona akórdaun sei kontinua iha loron 28/01/2011 oras tuku 14.00 lorokraik.

Atu hetan informasaun klaru, favor kontaktu;

Luis de Oliveira Sampaio

Direitór Ezekutivu JSMP

E-mail: [luis@jsmp.minihub.org](mailto:luis@jsmp.minihub.org)

Landline: 3323883